المسرحية الشعرية

غناوي الشمالي

تأليف وإخراج عبدالرحمن المناعي 1999

توطئة

في هذا النص الذي كتب ليكون شعراً بالعاميّة تفاصيل كتبت وأخرى لم تكتب فهـي تجربـة تحـاول أن تدمج الشعر بالفنون الشعبية من خلال غربة الشـمالي.

إن معالجة هذه الأوراق كمسرحية والحكم عليها من هـذا المنطلـق أمـر غيـر مطلـوب . فهـذه الأوراق مجرد البذرة التي ربما تورق وتنمو أو تذبل وتموت.

إن هذا النص كتب ليمنح الفرصة كاملة لبناء العرض المسرحي.

محاولة لمسرحة أشعار بالعاميّة كتبت لتمتد في حكاية تصور واقع وتبرز أهـم جوانبـه وتقـف حـائرة مابين الشعر والمسـرح إلا أن تلك الحكاية ومنذ ولادتها المبكرة لم تحـز تفاصـيل المسـرح ولـم تتوقـف عند دفق الشعر .. وبين الشـعر والمسـرح ربـاط وثيـق ربمـا شـكل المشـهد الأول .. لقـد اسـتهوتني تفاصيل الحكاية لا الحكاية نفسـها كون تلك التفاصيل تحفز على الدخول في عالم المشـهد وتفاصيله الموحية

المكان: في ساحة متناقضة الأشكال والمستويات تجمع مابين القديم والحديث .. قطع الديكور توحي بأشكال مختلفة تسهم في تشكيل العرض.

الزمان: غير محدد الملامح ويتغير بتغير الأحداث.

رجل 1 سمعت عن ميّ؟

رجل 2 وسمعت عن غيلان

رجل 3 بسكم من البحر ملينه.

رجل 1 هذا تاریخ یا

رجل 3 ماشاء الله عليك يابو التاريخ.

رجل 2 خلك منه اعرف ميّ واعرف غيلان.

رجل 1 منهم وشتعرف عنهم؟

رجل 2 قصت احبالك من عقب وصلها ميّ واستبعدت من عقب ماهي قريبه

رجل 3 ومن المحبه مابقى عندها شي صارت عقب ذيك الصداقة حريبة

رجل 1 لا .. لا مب اهي.

رجل 3 نوحي حمامه كل مانحت والعي غريب وانت ياحمامه غريبه

رجل 2 هذا اهي؟

رجل 1 قلت لك لا مب اهي . ميّ اللي اقصدها قائدة سفينه نوخذا بحر.

رجل 2 وغيلان؟

رجل 1 غيلان نوخذا ومع ميّ في ديره وحده .

رجل 3 قلت لكم سالفة عن البحر .. ملين ياجماعه ملينه ..

رجل 1 ووين بتروح عن البحر ها ؟ جدودك عاشو منه.

رجل 3 وانا شيخصني فيهم.

رجل 2 والبترول يا من البحر . يعني مالك بد.

رجل 1 بس البترول ... لا والغاز وحتي الماي اللي تشربه من البحر.

رجل 2 زين وعقب.

رجل 1 سفينة غيلان دائماً تسبق سفينة ميّ ..

(يدخل الشمالي رجل مسن يرتدي ملابس رثه ، طويل القامة جاحظ العينين يبحلق في الفراغ بشكل دائم)

رجل 3 *(بضجر)* الشمالي وصل ..

رجل 1 هذا ..

ملا هلال (يقاطعه) بس .. سالفة الشمالي مو لتسلية ولا تضيع الوقت (يحاول الرجل إكمال حديثه) .. ولا كلمه (يقترب الشمالي مترنحا وكانه مقيد من خلفه ... نسمع همهمات في الخلف تتنامى حتى تنتظم)

الشمالي هلي تشكون مني وانا منكم

عجيبه لوهمست للنار نخله

تطفيها بزود الحب

بزود الشوق للريح وتعبها

انا منكم *(تزداد الهمهمات)*

تودوني شمال الأرض .. منكم

تودوني جنوب الأرض .. منكم

تنسون اللي مد قلبه سواقي تنتحب لوجف مطرها

تبل موت العطش فيكم

تسامركم

إذا ليل الحزن خيم بأراضيكم .

(تزداد الهمهمات وتتحول الى أنين)

يادنيا البداية والنهاية والسفر والناس

وين ادروب ماتقطع رجا للناس

وین اعیون تنبع من هوی هالناس

انادىكم ... ىلى ھناك

أنا منكم

أنا أول غناوي ضمها دفتر

أنا أول قصايد في ورق اصفر

أنا أول حرف ممدود مابين الضمة والكسرة

أنا وجه الطفل لي صابته الحسره

بعد صوت العشق فيني ماجفت مواويلي

بعدكم ياضوا هالروح .. ماتطفى قناديلي

بعد ياعجفة المشموم اتخضر تنادي لي

(يقف ويسير مبحلقاً في الفراغ وكأنه يخاطب شخص موجود)

انا انتوا

تعب صوت المرار وانداحت اللطمه

تعلم وجهي من كل صوب

من کل پد

جذیه اهیه محبتکم ..؟

ملا هلال دمعك غرق الدنيا وبعدك ساير بدمعك

تخوفنا من الدنيا .

تصورها بحزن ماينتهي ويموت

تعذب كل من يسمعك

الشمالي من يضحك على دمعي

لا يضحك على خوفي

ولا يبكي على فرحي

حزات الفرح بترد

وبتغرد على جتوفي

عصافير الفجر لي أمطرت ياسميّن ...

وتحضني صحارى ماعرفتوها

ولا دمعي بيعلمكم عن اسرار الرمل والماي

ولا وقت الحبارى وبأي يوم ترد

ولا الصقار لين اعطى مواثيقه لريش الحر

ولا الوسميّ لي خضر جفاف البر

من يضحك على دمعي

يشوف في جرحي ويش سوي

بس هذي محبتكم *(يعاود الانهيار مع ارتفاع صوت الأنين)*

رجل 3 غناوي الشمالي نسمعها كل يوم .. مقرر .

ملا هلال ميّ وغيلان تاريخ يسليكم عن الحاضر .. وحتى سوالف الزير سالم وعنتر وابوزيـد .. لكن الشمالي بينكم عايش وياكم .

رجل 3 عايش في زنزانته .

ملا هلال للله قلت سوالف الشمالي مب راس كدو او استكانة جاي لا حد يذكر الشمالي .

(يفزع واقفاً مخاطباً الفراغ)

الشمالي يلي هناك

لا زرقة سما بتضم اساميّكم ..

ولا ليل السهر بيمر بناديكم

انادیکم

انا الموجوع من قلبه انا المسموم من عرقه

انا المخذول في وقت الفرح من ضارب الطاره

انا القابض على جمر الحقيقه

وراضي بناره

اناديكم لاخيمة عشق بتضم امانيكم

انا المصلوب مسحور ابمرار الوقت

مذبوح ابقصص ووهام ..

أناديكم وصوتي شاب وتلون بملح الدمع

وفي سوق النخاسة انتهك وانسام

وين انتو ...؟ تعالوا الحين ..

قبل لا يذبل النوار في قاصي الحشا ويموت

تعالوا ما بقى بالصوت انهد الصبر والحيل

تعالوا ما نخيت غير اللي في قلبي

تعالوا ما نخيت غير اللي له قلبي

لا والله عمري ما نخيت غيره

(الأنين مستمر ويتحول الى إنشاد حزين .. فتاة تتحدث في الهاتف)

فتاة

عم بقولو ماعندو بي... كان بيو بيطلع كل فجر لشط البحر بيقضي حاجته وبيتوضا وبيرجع على المسجد .. بس ذاك النهار مارجع ولهلا ماعرفو وين راح.. حدا بيقول خطفه البحر ودا بيقول تزوج جنيه .. مرته كانت حامل ولما ولدت جالها ولد سمتو عبدالله على اسم بيو وصار عبدالله بن عبدالله بس ماحدا بيناديه بها الاسم معروف عند الكل بالشمالي .

الشمالي انا مولود من صرخة

وسط بيت من سعف وحبال

في ديرة تمرها احوال

ويحكمها المرض والجوع

فجرها صرخة اليامال

ونهايتها ظلام القوع

تطوف الشمس في كل بيت يوميّة

ويسكنها القمر كل ليل

واذا ياله الصبح حول يغسل عجفته الفضة

في ماي اليال

(غناء في الخلف اطفال يرددون بعض الاهاريج)

تعلمت الصلاة ويا الادب والغوص ..

أول درس يعلمونك

جيف الدمعة تتحجر وسط عينك ولا تبكى

يعلمونك صبر ايوب

ومتى تسكت ومته تحكي

ويعلمونك جيف المريله تكبر

من ساعة فطامك وانته تتعلم تصير ريال

شلون تمسك الدله

وجيف اتقدم الفنجال

تعلمت الحبال واركض بلايا انعال

ما كنا ابد أطفال

تعلمت ابتسم في كل طريج ..

ابله ... سمني جيف ما تبي

بس انا الاصل يا سيد الجدران

انا الفرح والاحزان

احرث في جدارك فتحه او عنوان

لي وين تودي سكتاتك

لي وين يا سيدي لي وين *(يعود لهدوئه)*

لا ما تنشف الدمعات

ولا انتو يللي بعيد بيموت الوله فينى

اه يا جبرتي وعوقي

اه يا حسرتي وصوتي

اه يا عزوتي وعيني *(يصمت)*

رجل 1 ميّ ما اقبلت ها الوضع واول ماكان عرفوا الّشراع كانوا يجدفون لحد مايوصلون المغاص

رجل 3 لوكان عندهم فيزا ايبون ادريول يوصلهم .

رجل 1 لا اتطنز على سالفتي

رجل 3 ذبحتنا ابها السالفة

رجل 1 هذا تاريخ يا

(الشمالي ملقى في مقدمة المكان والأنين مستمر)

رجل 2 (بهمس) اذا اتعرف التاريخ قولي عن الشمالي وعن اصله ؟

ملا هلال قلت لكم ابعدوا عن سالفة الشمالي .

رجل 1 اذا كنا مجبورين يوميّا نسمع غناويـه اللـي مـاتخلص علـي الاقـل نعـرف شـللي يبيه؟وكلامه موجه حق من ؟ ومنهو اهو ؟

الشمالي *(يقف ويسير بإعياء)*

تسألني عن اعروقي

لو تسمع حنين الأرض

وصوت الموج لين اقبل على بيوت الحصى والطين

تشوف الناس تركض للمساجد تطلب الرحمة

نفخ ابليس في وسط الموج

ومنايرنا تكبر تلعن الشيطان

يا خلق الله ... روحو بعيد عن الأسياف

روحوا شاعت المايه

ابليس اللعين نافخ عجاج الموج .

ويتسرب ماي الملح ينخر في منازلنا

نازلنا غضب الأمواج في الغبة

ورد يسطي على حتى مراقدنا

وعنزتنا تصارع ردة الأمواج

لا توديها للأعماق

كبرنا وهللنا

وردينا عقب ساعة نلملم كل حوايجنا

اهناك انولدت يا سيدي اعلم

بلا قانون او جدران

بس حب تعلمناه

وفوق الحب والقلب اللي يشيل الحب

قانون اسمه القران

اسمعني اقولك عن سنين الديرة والخلان

(بغضب) ما كنتوا هناك واميّ بالحذر تلتاع

(مشهد اخر)

ام عبدالله حذار النوم ياوليدي

لا تفز في نصايف الليل .. تروح للكوع

وتتخيل يباس الخيش حضن امك

ولا تخلي التعب ايورق ابهمك

ياعيني حضن امك غطى ولحاف

لا ترتاع ابدا يانظر عيني ولا اتخاف

ياعيني

عيني لو اغمضها وافتحها

واشوفك ياضو عيني .. نوخذا سفار

الشمالي ما كنتوا تعرفوني

ولا كنتوا سمعتو شلون ينخرني التعب والخوف

ولا ليل البحر والدول

ولا التمر اللي مغموس ابقايا السوس

عود اخضر

واميّ في طرف حضرة جناب النوخذه دمعه :

ام عبدالله لا ريال عندي يا سبع البلاد

اشوف الله واشوفه

علمه علومة الاجواد

ابيه ريال .. حك اللي بلا ريال

(رجل يقود طفل للبحر .. غناء)

الشمالي انا ادري وهي تدري

اهي تنذرني حق نفس المصير والموت

لنفس الموجه اللي تودي للظلمه

رجل 1 ميّ قررت اتزيد عدد اللـي يجـدفون علشـان غـيلان مايسـبقها .. ومـن بـدال اثناعشـر مجداف سوتهم عشرين .

رجل 3 وينها عن البي ام دبليو

رجل 2 ماعليك منه .. كمل .

رجل 1 المهم ان غيلان عرف ان ها المره ماراح تسكت .. وانصحه مساعده وقال له : اذا تبـي تكسـر شوكتها تزوجها.

(مشهد زفاف في الخلف)

الشمالي في زفات الفرح قبل المطر بسنين

كان العود يبشر كل هل الديرة

ويفرشها الندى ومهامس النسوان (يرتفع صوت الغناء وننتقل لمكان أخر)

الأب من انته ؟

الشمالي ولد غواص وكتوفى تشك الخوف

وتيب الرزق غصبا على الأمواج

الأب اتصلي ؟

الشمالي نعم واحفظ جزو عم

الأب واهلك ؟

الشمالي اعيل اميّ وعماتي واخواني.

الأب وبيتك ؟

الشمالي في بيتي يالاقي خير كبر وحجيره وعشه

وهل الديرة بيبنون للمره حجرة اذا وافقت يا عميّ

(ترتفع الزغاريد ويتصافح الرجلان.. ونشاهد جلوة العروس)

كان العود يفوح بالدار

والدنيا تسامر بالفرح اميّ

والحنا تطوف بين السكيك نقشة

تبشر في الصبايا الشوق

وتعلمنا الفرح له حزه وحزه .

(موال حزين وسفينة مبحرة وهمهمات البحارة)

هذي انا

الحبل والبرد والموت في القرار

في زمن ملعون ما منه فرار .

في ظلام وخوف وجوع وعطش

ومرار ورزق مرهون بالتعب

هذي انا سيد القيعان جلاب المحار .. *(تتعالى نبرة صوته)*

لا ابد ما كنت مهزوم او جبان

افتح الجدران بعد وكتي نهار

(غناء موحي بنهاية الغوص)

رجل1 خطة زواج غيلان مانفعت .. وتمت مـيّ تحـاول .. كـل مـن زادت المجـاديف زيـد غـيلان مجاديفه .. لين ذاك اليوم شـافت بو بشـير ..

رجل2 يعني شنهو؟

رجل1 بوبشير مثل الجراده بس اضعف .

رجل3 وشدخل بوبشير في سالفتك يابوالعريف ؟

رجل1 هذا هي الساالفه .

رجل2 ایه وبعدین ..

رجل1 ميّ عرفت الشراع اول مره وهي اللي اخترعته .

رجل2 الله ..

رجل 1 نعم من جناح بوبشير اعرفت اشلون تسوي اشراع يوصلها لمغاصات اللؤلـؤ اسـرع مـن الحمـّع .

الشمالي بعد قريتنا ما راحت وجات بلاد

تعلمنا نخاف أكثر بلايا كره ولامنه

تحضرنا .. تمدنا

وتعلمنا : الوطن اكبر من القرية

ولا يحد البحر شوق العصافير

ودرسنا امتداد الحرف

ونشدنا في الطريق والصف

تعلمنا الوطن جنه

وفرقنا مابينات الغريب البعيد

وبين من عرقه في دمنا

(أجواء أخرى توحي بالعمل في أبار البترول)

كنت عامل اروح بعيد صبحية

اشيل اكياس ... احفر ... ليش ما ادري

اكنس اصبغ الجدران

يا سيدي الاصل ما هان

ومن عقب الشقا والموت

صار الحال ايسر من زمان أول

كتبت اسميّ في دفترهم

وصرت اسكن في حجره غير

والبس غير واكل غير

بس يا سيدي الداخل بقي داخل مثل الأول

في وقت الشده ياسيدي وفي وقت الخير

بس وشذنبي يا سيدي اذا كان المطر يختار

وربك قدر الارزاق

وحد ما تعجبه القسمه اذا كانت من الرحمن ؟

بس الانسان يبقى للابد انسان

وانا المخدوع ..كنت انسان .

(مشهد أخر)

عامل أجار أسبوع في الشركة أكثر من أجار سنة في الغوص .

عامل 2 قول سنتين . *(وهو يحسب راتبه بفرح)*

نوخذا *(يتقدم وهو يحمل صندوق خشبي)* بحارة عبـدالعزيز الفضـل واللـي اتركـوه وراحـو الشـركة لا ينسـون ديونهم *(يتقدم آخرين يحملون صناديق يكـررون نفـس النـداء العمال يدفعون لهم)*

ملا هلال عمال الشركة اللي كانوا بحارة تمو اكثر من خمس اسنين يسددون ديونهم لنواخذة البحر.

الشمالي انا التمره قسمتها في الظلام للنور

ما كنت مسحور .. لا بزود المطر و بمزاحمة الطيور

ما اقدر اشق جلدي ولا اطلع من انفاسي

بس ارجوك افهمني

ترا وسط الظلام تتنامى الاحزان

وانا يا سيدي ابدا

لا كنت سارق ولا ظالم ولا سكران

كسر سطوة الجدران (غناء في الخلف)

کنا نرکض

والنهار للي يعرف الشمس اول

صحوة الدنيا طفل اصغير يكبر

صحوة الدنيا .. الغصن بالنقطة يخضر

لا سبب يا سيدي

انا .. انا

البحر يعطي الوعد لدفة السفان ويخونه الهوا

وانا منه كنت اعرف طعم المرار

وشلون كفك ينكر القوة ويبوق الدوا

وشلون عينك تسرق الشوف من هدبها والضوى

تسألني عن اعروقي !!

من عقب البحر والخوف

في الركضة .. تغير كل شي فينا

بس من خارج الصورة

نعم من خارج الصورة

وفي ليلة مطر

وبرد العجوز ينخر دفا العظام

في اخر سنين الغوص بشرني الظلام بوليد

سميّته على جده اللي راح في القوع

وكان راشد

وراشد انفطم وانا في بير بترول

لبست اثياب غير اثياب

(بألم) وانسبيت بحجي رطنه

رجل 2 ساالفة ميّ وغيلان عجيبة

رجل 2 للحين تسمع الشمالي

رجل 1 الصاحب الانكليزي مره اغتاظ على الشمالي وقاله كلام ماعرفه .. لكن الشمال سئل عمال اقدم منه .

رجل 2 ایه وبعدین

رجل 1 عامل حب يغيضه قال له ان الصاحب قال : ان امك كلبه..

رجل 2 والله .. وبعدين..

رجل 1 ايقولون ان الشمالي نطر الانكليزي لين رقد وضربه بقطعـة حديـد فـي راسـه .. ذبحـه وشرد واختفى سنين لين ابردت السالفة .

الشمالي وبعد اسنين راح للمدرسة راشد

وصرنا في المدينة مدرسة وشارع

وكبر راشد واخو راشد

والشارع يضم اخوان يضم اجناس

واحنا بالفرح نفرح

تحاكمني على كوني ؟

علی بیتی ؟

علی راشد ؟

وين راشد ووين امحمد وخالد ؟

ليش الدنيا تتباعد

ليش اللحظة تتغير على الواحد

وليش الدنيا ما تصفى

صحيح بترد على كتوفي عصافير الفجر

لي امطرت ياسميّن ؟

مته .. باكر بعد اسنين او الحين ؟

يلي اهناك انا منكم

عجيبه الحين صرت مجنون

صرت سارق ، صرت ظالم

صرت مشكوك في امري

صرت شاري جذور اصلي بماي الغيث

يلي اهناك

انا امروس الافراح

وانا اللي مشعل ابليل السواد اسراج

لا ما غابت خيوط الذهب بالشمس

ولا ماتت شفاة الورد بفعل اللمس

لا ما ترحل من عيوني

انا موجود

انا اقوى من الافعال

ما تقدر ایادیکم

لا ما تقدر اتودي الشعاع لبعيد

ولا تحقق اياديكم فعل الطمس

انا اقوى من الافعال

انا موجود

ملا هلال لا حول ولاقوة الا بالله ..

رجل 3 قلنا لك هذي سالغه ماتنتهي

ملا هلال لو انتهت ياوليدي بننتهي كلنا .

رجل 3 وشتذكر منها ياملا ؟

ملا هلال الحياة مثل السلسلة مثل المسباح كل حبة توصلك لحبة.

رجل 2 يعني ماصارله شي .

رجل 1 شرد راح لبلاد غير لكنهم بعد اسنين صادوه ..

رجل 2 وعرفوا انه الي ذبح الانكليزي ؟

رجل 1 لا ماصادوه علشان ذبحت الانكليزي .. صادوه في المظاهرات الـي قامـت بعـد العـدوان الثلاثي على مصر.

الشمالي بعدكم في الصحو تمشون

وانا احسب كم باقي من الدين اللي في رقبتي

واصفق منتشي لو خيولكم مرت

من يحفر في درب السيل يتبلل

لا سكران ولا اهبل

بس حامل صفا الامواج والزرقة .

ملا هلال مثل السلسلة مثل المسباح كل حبة توصلك لحبة.

النهاية